

五市檔案
漏卮本末
英人窺邊請撫

瑞之

中西紀事
卷

伍肆卷



易方樓

為定本

與人定本

瑞

之



中

西

紀

事

本

附錄

中西紀事卷之三

互市檔案

江上蹇叟

國朝康熙二十二年滅鄭氏臺灣平越二年臺臣請開海禁報可於是設椎關
四在於粵東之澳門福建之漳州府浙江之甯波府江南之雲臺山時荷蘭以
助攻鄭氏有功首請通市大西洋素稱饒沃又其人勤於貿易多操海船為生
涯自荷蘭得請則明以前之未通中國者皆爭趨之英吉利者大西洋之強國
也自明以來拓地漸廣開通市岸及於東南洋當康熙之初即謀通商於澳門
以海禁未開而止九年鄭成功之子經方踞臺灣英商來往於廈門臺灣等處
凡數歲鄭減其稅而羈縻之藉以控制荷蘭未幾耿鄭交兵藩臣內訌
朝廷議先定沿海邊界防外洋之助鄭為患者於是英人以華商交易不便復
去之及臺灣隸入

大清版圖英人又疑新拓之區稅則必重乃舍閩赴粵東又時來往於浙之舟山甯波等處而其時英吉利之名不著但知其為紅毛之番族而已五十六年總兵陳昂始奏稱粵東紅毛有英主黎諸國最為奸宄蓋其時通市於廣州澳門等處屢以稟關索費太重糾洋商合詞爭之雍正之初又議增收禮物銀兩乃於七年合詞控於大府得稍稍裁減未幾官吏又增出口之稅於是英人始有移市入浙之志矣初浙之海關設於甯波舟山尚未置縣商船出入甯波往還百數十里水急礁多往往回帆遲去迨定海既設監督張聖詔始請移海關於定海部議從之乃於定海城外道頭街之西特建紅毛館一區以為番船來往之逆旅自是浙之定海商船日多英商以粵中不便數來往舟山見今昔情形之異乃定計爭之乾隆二十年英舟泊定海港有總商喀喇生通事洪任禪請於浙之甯紹台道願在定海納餉許運貨至甯波府聞粵兩督聞之以其利浙稅之輕而致關課之絀也二十二年閩粵總督上言浙關正稅請視粵關則

例酌加增一倍部議從之奉

旨洋船向收廣東口由粵海關稽察徵稅浙省甯波不過偶年一至今奸牙勾約漁利至甯波者甚多番船雲集日久留住又成一粵之澳門矣今更定章程視粵稍重俾洋商無所利而不來以亦限制意初不在增稅也未幾部臣復議外洋不准赴浙貿易定制歸併粵東一港每年夏秋交由虎門入口是時方嚴絲助綢緞出洋之禁英吉利雖時時違制潛赴甯波無所得仍增新制在粵通市粵中初設洋商通事洋行據為龍斷之利誅求不已串通官吏規費益增於是英商洪任輝等仍赴浙請在甯波開港而浙撫已奉新令悉毀英商旅餉聞其舟泊舟山遂發令驅逐斷其岸上接濟之食物洪任輝憤甚乃由舟山泛海直抵天津仍乞市通甯波並許粵關積年規獎奉

旨詰責飭將洪任輝由旱道押赴廣東遂於二十四年七月奉

命著福州將軍以欽差赴粵校驗苛勒有狀將監督家人問罪又因洪任輝

應違制擅赴天津押往澳門園禁三年始釋之自此諸番通市等中奉法惟謹
乃事閱三十年樊瑞復起向之裁改歸公者又增其費而加重焉各洋商皆以
為不便而懲洪任輝之往事未敢訟言英國王雅治乃與其臣下謀議以
純廟八旬萬壽入貢天津乘間言之五十八年英國遣其使臣馬甘尼一作馬夏爾尼
由海道赴天津入貢始通中國也時

上以遠人嚮慕誠款可嘉特命理藩院導之入覲嗣使臣以其國王表文進仍
請在浙開港並通市天津又欲援俄羅斯往例遣人寄住京師

上以甯波天津無通事洋行交易未便且俄羅斯自立恰克圖後久不在京寄
寓所請給舟山海島並廣東附近省城地華夷參錯斷不可行因

特頒敕諭前後二道逐款指駁示以中外之防使臣乃不敢言比其反也

上遣重臣伴送由內地經歷直隸山東江蘇安徽浙江福建至粵東放洋回國
貢舟過甯波請便道市茶絲出洋許之馬甘尼回國國王開讀

教諭自知所請與中國體制不符事遂寢然雖絕意於舟山猶思還志於澳門又其時英人方與佛郎西構兵懼其播聞於中國因

教諭中有許其再來款貢之語乃於六十年復具書幣由粵之大班轉呈粵撫代為呈奏並述其昔年曾帶兵船至的密地方助

天朝大將軍蓋福康安征廓爾喀時事也粵撫譯其文以其詞極恭順

上亦優答之然其來往澳中既甚澳夷又防佛郎西展轉包藏遂有嘉慶十三年之事

澳門者各洋貿易來往之所聚而葡萄牙亞實主之乾隆間定制並歸粵東暫泊黃埔交市事竣仍回澳門住冬轉向澳夷賃屋棲止限滿則驅之歸國又澳夷但輪船鈔不似諸番貨船竝稅英人自通市於粵設四班公司經理貿易欲得中國一島之地如新嘉坡麻六甲者以為逆旅其形更無過澳門而為葡萄牙所先已積不能平又見澳中官吏與之為援尤陰慕之迨乾隆之末入貢要求

請令澳門寄住之洋商得出入自便意欲效澳夷事例得以輕賦自立馬頭而
未敢訟言

上亦陰相制馭故勅諭中但令其循向來澳門貿易之常例而英人窺之不已
嘉慶七年英有兵船六泊雞頸洋託言佛郎西欲候澳門故遣兵來戍實則藉
詞窺澳也葡萄牙人覺之乃告於大府飭洋商宣諭令其釋兵回國遂以是年
六月去去之日遣夷陳謝仍以佛郎西為言時粵中大吏以其在澳未久又不
煩兵力遂秘之而其事已寔聞於

上迨十年英國主復具方物遣使臣附商船來粵譯其表文則以方與佛郎西
構衅恐其播謠於中國以聞我蓋自說其七年之役也是時英商每有貨船輒
以兵船防護之又恐中國疑其侵有澳門之事值閩粵之間海氛不靖乃託以
協勦海盜游奕內洋

上見其表文中有欲為中國効力之語諭新任總督那彥成至粵整飭戎備其

護貨之兵船亦令申畫疆界毋使侵踰越三年而澳中之衅復起十三年英將

有度路利者

一作圖禮

自安南敗歸以其餘艘抵澳亦聲稱佛郎西取小呂宋將順

道襲澳門葡人知其詐而粵之大班有喇佛者以七年之役為澳夷所間挫衄

而歸欲以此時兵力唆令度路利占澳門為補牢計大府聞之即飭諭洋商傳

論大班令遣兵船回國且告曰澳門非葡萄牙所有乃我

大清土地也佛焉敢侵軼我且邊寇有警中國自能禦之母勞戍師致吾民驚

擾度路利聞之怒乃率兵登岸占據市樓澳門之民驚恐罷市時兩廣總督吳

熊光粵撫孫玉庭聞變乃援照違抗封艙之案調兵守禦度路利遂率兵船三

徑駛入虎門進泊黃埔又自黃埔乘杉板船數十艘直抵會城八館寄寓揚言

將割十三洋行以修通怨度既下令兵船爭趨之乃有碣石鎮總兵黃飛鵬以

師船橫截省河飛砲擊斃夷兵一傷者三始懼而退然其踞夷館如故也時大

班索還累年商欠又以封艙停市請退所買之茶而償其值虛聲恫喝夷酋益

張適英吉利本國有船主來聞封艙之事對大班曰犯中國而罷市雖得澳門猶石田也先時洋船率以七月抵粵停泊黃埔換貨不過兩月交冬即回帆去至是泊港外數月貨無起色各商亦怨謗沸騰大班喇佛乃言於度路利責澳夷納賂以番洋六十萬犒師英之兵船始具狀歸誠請照舊通市維時方奉勅辯之

諭旨各路官兵雲集者二千六百名而督撫意在弭衅遂許以兵退開艙於是度路利以冬月起旋出洋蓋已有成約也

上以吳熊光辦理遲緩又不親蒞澳門耀示兵威雖開艙在夷兵既退之後而許之在先

嚴旨切責旋飭新任督臣馳赴澳門查訪盡得其情因劾熊光示弱畏葸狀遂與巡撫孫玉庭俱論罷遣有差是役也英人覬覦濠鏡自謂與

天朝元纖芥之嫌而度路利稱兵入省實由封艙激成且其自安南來亦非該

國王本意大班喇佛教唆其事聞於英國國王遂革大班之職喇佛不敢歸復回粵粵中人以前事銜之驅逐回澳數年憂死

自公司局之設也大班來粵者率寄寓洋行行人事之唯謹然所以朘削之者無所不至又與關吏因緣為奸課稅既增則規費抽用亦增有取之十倍二十倍於前者十五年英之大班稟控粵撫謂各洋貿易資本皆自國帑借領不堪虧折請酌量裁減以利遠人粵撫韓封檄飭布政司核議久之竟寢不行當初定行用時每兩奏抽三分以作洋行辛費繼而軍需出其中貢價出其中各商攤還西債亦出其中遂分為內用外用名目於是各洋利薄怨生屢思藉貢輸枕以希

恩澤二十一年英國王復遣使臣分入粵東京師其至粵者曰加拉威禮方至粵輒爭謁見儀注以舊制貢使見制府將軍皆免冠俯伏大吏坐皇堂受之加拉威禮不可時粵督蔣攸銘方入覲攝事者為董教增許免拜伏禮僅免冠致

敬大府亦離席立受之是時英之正貢使羅爾美副貢使馬禮遜已乘貢舟達

天津夏六月

上遣大臣戶部尚書和世泰等賜宴使臣於天津有司諭以謝宴時應行跪叩禮不可將入都又告以乾隆二十八年該國使臣入覲儀注不答時上在圓明園尚書和世泰等先期導使臣自通州起行一晝夜馳至御園車馬困頓而使臣衣裝輻車皆落後蓋惡其不肯循跪叩儀注欲以計尼之時使臣表文未賁禮服不備倉皇失措遂以病辭而

睿廟已詰朝御殿傳呼和世泰始以正使病聞復

召見副使又不至

上怒其無禮命卻其貢不納即日遣理藩院押回通州瀕行仍令援乾隆五十

八年例由內地走行是役也使臣失禮實以衣車未至之故

上詢之廷臣始知當日理藩院交接不如儀乃遣和世泰酌收貢物數事仍頒

教諭賜其國王珍玩以答遠忱驛交粵督蔣攸銑令慰遣之然英使本欲以粵東增規費事入告竟不得達快快而去大班之在粵也初寓洋行繼則立公局久留粵中已不復循回澳佳冬之例道光之初奧城外不戒於火民居多拆為平陸英商欲廣其公局乃藉修葺為名以次侵占托地數里而其地當對河居民渡口居民欲返其故地不得乃控於大府時大學士李鴻賓任兩廣總督實不理粵人謂其受洋商賄乃乘其入覲之間控於粵撫朱桂楨朱在粵素有威望洋商憚之聞控震怒立鎖拿通事下獄洋行懼誤開艙事跪求免究乃親督折毀平之英商之桀黠者果以八事入稟要挾停止開艙相持有半年仍以孟加刺新到之船主居間調停事遂解此道光七八年間事也初洋商在粵通市定制不得攜帶家屬自大班公司之設出入自便遂於八年秋有大班某挈一洋婦寄寓粵城而其時十三洋行中有東裕行事司謝某為買肩輿出入乘坐久之夜郎自大翻不許行中人乘輜入館大府廉得之立拏謝某究治瘐死獄

中大班聞其事輒架大砲於夷館外設兵自衛大府慮激變乃遣通事蔡剛以理曉諭令撤去兵砲並速遣夷婦回國於是洋行具稟託以大班患病需人乳為引俟稍愈當即遣之大府據稟完案不復根追夷婦卒逗留不遣數年之後義律來粵竟以挈婦為援例之常而邊衅亦因之起矣

義律者英公司散後續到之大班也英人自開港於粵惟公司船許赴粵中貿易此外散商不聽擅自出入著之令甲以二百年為限其公司大班亦定以三十年一瓜代所有貿易資本悉領自國庫中歲收其息嗣因公司乾沒庫帑不能償又於十三年後復請展限限滿則虧折如故英國主見其黨與日多駸駸乎不可制亟思設法解散之值道光十年後屈指例將屆

大清通商二百年之期

據西人紀載以解散公司為十四年事然律勞卑以是年來粵為虛制使所逐則解散必在十年以後十四年

以前二百年者亦舉其大數而已

遂乘機裁革前例解散公司之局聽散商各自牟利英之富

商皆以為便而中國素惡公司橫甚不如散商之易於制馭惟十三洋行與公

司交通既久狼狽為奸反以為不便乃託言公司散後統領無人因有再著大班來粵之請十四年盧坤調任兩廣總督奏請

飭令洋商寄信回國仍援前例派公司大班來粵管理貿易英國主得信即遣領事一人名律勞卑者以是年秋至澳由澳來粵大吏以其未經通報闖入省

河慮非其國主所遣

是時有銜史奏稱律勞卑帶領兵船進至黃埔督臣盧坤調派水師布置嚴密旋即呈恩悔罪請領紅牌出口云云

蓋但知其驅逐律勞卑之事而其時大班來粵實出口督臣所請核之十六年義律至班粵督奏聞奏中仍理前次督臣請寄信遣大班來粵之案是此時之驅逐有因也乃派員押回澳門其十六年繼至者則義律也義律之來英人初議欲

在粵中設立審判衙門專理各洋交涉訟事不管貿易蓋欲仍聽散商自行經理然其時各洋資本首推英商而義律初至洋行尤謹事之遂以是年冬携一妻一子來粵名為約束商人水手不管貿易實則總攝其事諸番之在粵者咸仰其鼻息不敢自樹異同十九年薑船之役義律主之時

欽差大臣查辦來粵飭令各洋將薑船鴉片悉數繳銷首傳義律不至嗣因各

洋稟覆稽延拘其奸商願地等義律適自澳門回則封船撤去沙文沙文即洋商買辦見後之令已下不得已始遵飭繳銷而悻悻欲圖報復之意不已也義律寄信回國仍住澳門是年之秋各洋貨船來粵者皆遵

諭停泊澳洋聽候中國委員查驗義律首發難端凡英之貨船悉配以兵船聚泊尖沙嘴不聽查驗制府發令驅逐三挫其鋒始駛出老萬山復行文照會索償烟價以為入粵配茶之需制府見其跋扈一面照覆責其不守臣節一面奏請停止英夷貿易是時邊衅方起內外諸臣有請閉關封港並外洋各國一律停止通商

上發交粵督議奏林則徐上言罰不及衆必須示以大公今以英夷不遵法律輒將恭順之各夷一例峻拒未免良莠不分設各夷稟問何辜臣等即碍難批示且自英人貿易斷後他國願欣欣向榮蓋逐利者喜彼繼而此贏懷憤者謂此榮而彼辱此中控馭之法正可使其相聞相睽輸忱內向若概與之絕轉易

聯成一氣昔人所謂彼則聚而協以謀我者不可不預為之防等因奉

旨如議然是時如彌利堅港脚等國之貨船雖奉准開艙而英人以兵船攔阻口外不得入二十年冬琦善以欽差赴粵方欲議撫許英人照舊通商而義律遽謀先戰後商遂有大角沙角之師粵撫奏稱自用兵以來關課短絀所到洋艘已不及向來十分之二又被英夷攔阻泊在港外守候開艙遥遥無期時上已授貝子奕山為靖逆將軍隆文楊芳為參贊大臣飭令到粵先查明各國情形果否怨恨英夷阻撓生計抑稍有缺望於

天朝未能招徠撫綏以致向隅失業據實陳奏等因蓋

上意在懷柔遠人更欲使疆臣體察夷情如其怨恨有因即可加意招徠供我指臂之近交遠攻之計也然其時各洋以阻梗牽留輒思各帶兵船與之講論而義律詭以甘言謂撫事已有成議因之各洋急欲開艙反為英人作說客而大府不悟也二十一年二月英人闖入虎門攻破烏涌卡座時則港外之彌利